

明史稿



史藁

列傳第八十二

光祿大夫 經筵講官明史總裁戶部尚書加七級臣王鴻緒奉

敕編撰

鄭岳

劉玉

汪元錫

寇天叙

唐胄

潘珍余光

潘旦

潘希曾

李中

歐陽鐸

陶諧

孫大順大臨

盛應期

潘垣

呂經

歐陽重

朱裳

陳察

孫懋

王儀

王學夔

曾鈞

岳字汝華莆田人弘治六年進士為戶部主事改刑部主

事董天錫偕錦衣千戶張福決囚福坐天錫上岳上言錦衣

部轄也主事部屬千戶衛屬今列其上不可且邇多紛更糾劾非鎮監職而董讓行之太常本禮部屬而崔志端專之陛下不寘於理臣下效尤無忌憚忤旨逮繫詔獄尚書周經侍郎許進等救不聽都御史閔珪當岳贖杖還職從之尋進員外郎遷湖廣僉事歸宗藩侵地於民治施州夷民相讐殺者荆岳饑勸富民出粟弛河泊禁屬縣糧當輸遠衛者給以直民乃獲濟正德初擢廣西副使上官岑猛當徙福建據田州不肯徙岳許爲奏改近地猛乃請自效尋改廣東遷江西按察使就遷左布政使宸濠奪民田億萬計民立砦自保宸濠欲兵之岳持不可會提學副使李夢陽與巡按御史江萬實相訐岳承檄按之夢陽遂執岳親信吏言岳子沄受賕宸

家因助夢陽奏其事囚掠汴巡撫任漢顧慮不能決給事中
王爌請遣大臣往勘帝乃遣大理卿燕忠會給事中黎奭按
問忠等奏勘岳子私有迹而夢陽挾制撫按俱宜斥岳遂奪
官爲民宸濠叛中外交薦起四川布政使以憂不赴世宗初
擢右副都御史巡撫江西甫兩月召爲大理卿嘉靖元年冬
上言內臣有犯宜聽部院問理毋從中決不能從帝數不豫
岳請遵聖祖寡欲勤治之訓宮寢有制進御以時而退朝卽
御衣華裁決章奏日暮還宮以養壽命之源報聞出按甘肅
亂卒事總兵官李隆等皆伏罪還朝以災異陳刑獄失平八
事尋遷兵部右侍郎時大禮未定岳言若以兩考爲嫌第稱
孝宗廟號毋稱伯考以稍存正統大學士石瑄請從之帝切

責瑤奪岳俸兩月轉左侍郎請罷山海關稅弗許中官崔文欲用其兄子爲副將岳持不可寧夏總兵官仲勛行賄京師御史聶豹以風聞論岳岳自白因乞休去

劉玉字咸栗萬安人祖廣衡永樂末進士正統間以刑部郎中出修浙江荒政積粟數百萬督治陂塘爲旱澇備景泰初歷左副都御史鎮守陝西請遇災傷毋俟勘報卽除其賦庶有司不得借覆核陰行科率從之已兼撫福建浙江議創壽寧縣於官臺山以清盜窟討平處州賊居官以廉節稱終刑部尚書父喬成化初進士累官湖廣左布政使玉登弘治九年進士授輝縣知縣發粟賑饑奏蠲虛稅復業者千家擢御史初孫伯堅金琦王寧皆以傳奉得官已又以指揮胡震爲

都指揮分守通州王抗疏言傳奉不已繼之內批大累聖德
乞皆罷之不納武宗卽位甫四月災異迭見王陳修省六事
出按京畿中官吳忠奉命選后妃肆貪虐王奏不問劉健謝
遷罷王馳疏言劉瑾等佞倖小臣巧戲弄投陛下一笑顧讒
邪而棄輔臣此亂危所自起況今白虹貫日彗見紫微宮星
搖天王之位民窮財殫所在空虛陛下不改圖天下將殆乞
置瑾等於理仍留健遷輔政不報王遂引疾歸後瑾榜王奸
黨復誣構之罰輸粟塞下者三最後逮繫詔獄削籍放歸瑾
誅起河南僉事遷福建副使皆董學政召爲大理少卿正德
十五年擢南京右僉都御史提督江防宸濠反攻安慶王以
舟師赴援事定改撫鄖陽世宗卽位召爲左僉都御史論遏

亂功進右副都御史嘉靖元年改左歷刑部左右侍郎初偕九卿爭興獻帝不宜稱皇及帝欲考獻帝又偕廷臣伏闕哭爭以大臣不罪六年秋坐李福達獄削籍卒於家玉所居僅庇風雨天文地理兵制刑律皆有論著隆慶初贈刑部尚書諡端毅子懋南京工部右侍郎歷官亦有聲

汪元錫字天啟婺源人正德六年進士授兵科給事中三遷都給事中陝西鎮守中官廖鸞族子鎧冒功爲錦衣千戶隨鸞於陝元錫爭之言鎧父鵬亂中州不可使鎧復亂陝右乞徵還鸞宣鎧父子於理偏頭關之捷錄功太濫偕同官言太監張忠總兵官劉暉等不宜賞湖廣鎮守太監杜甫請巡歷所部帝許之元錫等據祖制力爭帝幸昌平宣府大同元錫

偕同官邢寰累疏諫復言宣府守將朱振等皆扈從西巡寇
乘虛入塞何以禦之已聞帝將選禁軍親征四海治部寇復
極陳不可安遠侯柳文鎮湖廣奏攜參隨七十餘人元錫乞
寢所奏車駕還京以應州之捷大賚文武羣臣元錫等言是
役殺邊民無筭六軍多傷今君臣欣喜交賀而軍民繫賊庭
南向號哭臣等何忍受賜中旨以納粟都指揮馬昊守備儀
真復遣內官分守潼關山海關駕又幸大喜峰口欲招三衛
花當把兒孫元錫等皆抗章諫帝欲南幸舒芬黃鞏切諫得
罪給事御史遂不敢爭及帝將親征宸濠元錫復諫沮宸濠
就執元錫寰偕六科馳疏請迴鑾十五年帝在南京元錫等
復屢申前請且言供億繁費使牒旁午奸宄冒官校少女充

離宮陛下不以宗社爲重專事逸遊豈能長保天下語甚危切中旨以內官晁進楊保分守蘭州肅州元錫等言二州逼強寇不可增官守累軍民羣小不悅矯旨責之詔改團營西官廳爲威武團練營以朱彬朱泰等提督之別擇地爲團營教場元錫言拓地則擾居民興工則費財力以朝廷自將之軍而彬等槩加提督則僭名分不從會帝崩事已世宗卽位疏言都督邵永以附江彬下獄宜釋而用之錦衣都指揮郭鰲等十人皆彬黨宜下獄治咸報可張銑許泰繫獄帝忽宥其死元錫爭不聽屢遷至太僕卿嘉靖六年帝以李福達獄下三法司於理元錫不能平有後言聞於張璁并下獄奪職後用薦起故官歷戶部左右侍郎致仕卒寰黃梅人正德三

年進士數言事有直聲

寇天叙字子惇榆次人由鄉舉入太學與崔銑呂柟善登正
德三年進士除南京大理評事進寺副累遷應天府丞武宗
駐南京從官衛士十餘萬日費金萬計近倖求索倍之尹齊
宗道憂懼卒天叙攝其事日青衣皂帽坐堂上江彬使者至
好語之曰民窮官帑乏無可結歡丞專待譴耳彬使累至皆
然彬亦止他權倖有求則曰俟而奏即予中官拘妓女數百
人多餓死以天叙言得釋禁軍糴民物天叙募人與搏而兵
部尚書喬宇選拳勇者與搏戲禁軍卒受傷慙且畏不敢橫
駕駐九月南京不大困者天叙與宇力也嘉靖三年以右僉
都御史巡撫甘肅回賊犯山丹督將士擒其長脫脫木兒西

域貢獅子犀牛西狗天叙請却之不聽進右副都御史巡撫陝西寇入固原擊敗之斬首百餘又討平大盜王居等累賜銀幣歷兵部右侍郎卒家貧喪事不具天叙在太學時嘗聞父病疾馳六晝夜抵家父疾亦瘳

唐胄字平侯瓊山人弘治十五年進士授戶部主事以憂歸劉瑾斥諸服除久不赴官者坐奪職瑾誅召用以母老不出嘉靖初起故官疏諫內官織造請爲宋死節臣趙與珞追諡立祠進員外郎遷廣西提學僉事令土官及徭蠻悉遣子入學擢金騰副使土酋莽信虐計禽之木邦孟養構兵胄遣使宣諭木邦遂獻地屢遷廣西左布政使官軍討古田賊久無功胄遣使撫之其魁曰是前唐使君令吾子入學者卽解甲

擢右副都御史巡撫南贛移山東遷南京戶部右侍郎十五年改北部進左侍郎帝以安南久不貢將致討郭勛復贊之詔遣錦衣官問狀中外嚴兵待發胄上疏諫曰今日之事若欲其修貢而已兵不必用官亦無容遣若欲討之則有不可者七請一一陳之古帝王不以中國之治治蠻夷故安南不征著在祖訓一也太宗旣滅黎季犛求陳氏後不得始郡縣之後兵連不解仁廟每以爲恨章皇帝成先志棄而不守今日當率循二也外夷分爭中國之福安南自五代至元更曲劉紹吳丁黎季陳八姓迭興迭廢而嶺南外警遂稀今紛爭正不當問奈何殃赤子以威小醜割心腹以補四肢無益有害三也若謂中國近境宜乘亂取之臣考馬援南征深歷浪

泊士卒死亡幾半所立銅柱爲漢極界乃近在今思明府耳
先朝雖嘗平之然屢平屢叛中國士馬物故者以數十萬計
竭二十餘年之財力僅得數十郡縣之虛名而止況又有征
之不克如宋太宗神宗元憲宗世祖朝故事乎此可爲殷鑒
四也外邦入貢乃彼之利一則奉正朔以威其隣一則通貿
易以足其國故今雖兵爭尚綮綮奉表牋具方物欸關求入
守臣以姓名不符却之是彼欲貢不得非抗不貢也以此責
之詞不順五也興師則需餉今四川有採木之役貴州有凱
口之師而兩廣積儲數十萬率耗於田州岑猛之役又大工
頻興所在軍儲悉輸將作興師數十萬何以給之六也然臣
所憂又不止此唐之衰也自明皇南詔之役始宋之衰也自

神宗伐遼之役始今北寇日強據我河套邊卒屢叛毀我藩籬北顧憂方殷更啟南征之議脫有不測誰任其咎七也錦衣武人闇於大體倘稍枉是非之實致彼不服反足損威卽令按問得情伐之不可不伐不可進退無據何以爲謀且今嚴兵待發之詔初下而征求騷擾之害已形是憂不在外夷而在邦域中矣請停遣勘官罷一切征調天下幸甚章下兵部部臣亦以爲忠謀得旨待勘官還更議明年四月帝決計征討侍郎潘珍兩廣總督潘旦巡按御史余光相繼諫皆不納後遣毛伯溫往卒撫降之郭勛爲祖英請配享冑疏爭帝欲祀獻皇帝明堂配上帝冑力言不可帝大怒下詔獄拷掠削籍歸遇赦復冠帶卒隆慶初贈右都御史冑耿介孝友好

學多著述立朝有執持爲嶺南人士之冠珍字玉卿婺源人弘治十五年進士正德中歷官山東僉事分巡兗州劉七等猝至有備不敢攻引去掠曲阜珍奏徙縣治而城之遷福建副使湖廣左布政使嘉靖七年以右副都御史巡撫遼東累遷兵部左侍郎其諫討安南曰陳曷莫登庸皆弑逆之賊黎寧與其父諱不請封入貢亦二十年揆以大義皆所當討何獨徇寧請爲左右且其地不足郡縣置叛服無與中國今北敵日蕃聯帳萬里烽警屢聞顧釋門庭防遠事瘴蠻非計之得宜遣大臣有文武才者聲言進討檄數登庸罪赦其脇從且令黎寧合勦賊父子不擒則降何必勞師帝責珍撓成命褫職歸尋以恩詔復官致仕珍廉直有行誼中外十餘薦皆

報寢卒贈右都御史旦字希周珍族子弘治末進士知漳州邵武三遷浙江左布政使斥羨金不取嘉靖八年擢右副都御史撫治鄖陽數平巨寇累遷刑部右侍郎十五年冬以兵部左侍郎提督兩廣軍務詔起復毛伯溫討安南旦行過其里語之曰安南非門庭寇公宜以終喪辭往來之間少緩師期俟其聞命求款因撫之可百全也旦抵廣適安南使至馳疏言莫登庸之篡黎氏猶黎氏之篡陳氏也朝廷將興問罪師登庸卽有求貢之使何嘗不畏天威乞容臣等觀變待彼國自定若登庸奉表獻琛於中國體足矣豈必窮兵萬里哉章下禮兵二部族父珍適以言得罪尚書嚴嵩張瓚絀旦議不用會伯溫入都見旦疏不悅言總督任重宜擇知兵者遂

改旦南京兵部以張經代之未行引疾乞休且言伯溫一入朝輒敢移督撫大臣他日得志何所不爲帝怒勒致仕將還吏白例支庫金爲道里費旦笑曰吾以不妄取爲例卒贈工部尚書旦上書半歲廣東巡按御史余光亦言黎氏魚肉國君在陳氏爲賊子抗拒中國在我朝爲亂魁今失國或天假手登庸以報之也自宋以來丁移於李李奪於陳陳篡於黎今黎又轉於莫欲興黎氏勢必不能臣已遣官責其修貢道里懸遠往復陳請必失事機乞令臣便宜從事帝以光疏中引五季六朝事下之兵部咎光輕率奪其俸無何光進鄉試錄禮部尚書嚴嵩摘其誤奏之被逮削籍光江寧人

潘希曾字仲魯金華人祖洪廣西僉事父璋陝西副使希曾